

清史列傳

冊里

清史列傳

卷一百一十五

清史列傳 卷四十二

大臣傳續編七

姚元之

姚元之安徽桐城人嘉慶十年進士改翰林院庶吉士十二年高宗純皇帝實錄告成元之以纂修議敘命毋庸散館卽授編修十三年充陝甘鄉試正考官十四年五月命在南書房行走給事中花杰奏考取南書房四人姚元之係協辦大學士戶部尙書戴衢亨侍郎英和門生文字雖優鑽營尤甚得旨姚元之試卷本佳並非英和戴衢亨力薦花杰任意詆訐著交部嚴議旋以南齋事簡元之仍撤回館十月上五旬萬壽元之獻詩賞緞疋及筆硯諸物十七年二月大考一等陞侍講五月恭刊高宗純皇帝聖訓於廟號有誤元之時充武英殿提調未經覆覈上以元之到館未久降爲編修仍罰俸二年十九年三月充會試同考官五月提督河南學政二十年三月奏請嚴禁坊刻類典等書諭曰士子研經稽古於五經三傳自應徧讀全書融鑄淹貫發爲文章方足以覘學識乃近多鈔錄類書剿襲撫

拾冀圖詭遇不可不嚴行飭禁該學政隨時查禁責令銷燬外歲科考拔生童有仍將此等類聯鈔錄者卽擯棄不錄以正文風而端士習七月諭將吏治官常匪徒打搶一切情形據實密奏尋奏查匪徒肆劫多係河南與安徽湖北邊界之人名曰捻子手平日與良民無異及互相讐殺各以黨從經撫臣節次拏辦猖獗之風稍息至陳州汝州同在一省而南北鹽運迥殊私梟過境時土匪從中把持合則護送之不合則搶奪之此又匪徒滋事之情形也報聞二十三年丁父憂二十五年服闋道光二年充咸安宮總裁三年充文淵閣校理四年六月仁宗睿皇帝實錄告成元之以纂修議敘得旨以應陞之缺陞用八月陞右春坊右中允充日講起居注官尋大考二等轉左春坊左中允十二月陞司經局洗馬六年三月陞翰林院侍講十月轉侍讀七年遷右春坊右庶子尋陞翰林院侍講學士十年轉侍讀學士十一年二月陞詹事府詹事六月稽察左翼宗學十二月充文淵閣直閣事十二年二月陞內閣學士兼禮部侍郎銜七月署兵部左侍郎十三年正月陞工部右侍郎兼管錢法堂事務仍兼署兵部左侍郎二月疏請整頓臺灣營務諭曰國家養兵衛民所以戢奸禁暴如該侍郎所奏窩倡聚賭械鬪殺人不服管

束尙復成何事體甚至營中操演有受雇替代之弊則是我兵竟作壁上觀而此輩無籍游民性本獷悍而又習之以戰鬪假之以兇器豈不相率而爲盜耶著程祖洛實力稽察毋稍姑息三月調刑郡右侍郎四月坐疏防官犯李相清越獄降四級留任六月兵部書吏假發驗票案發元之以前署左侍郎坐失察降一級留任七月充大考翰詹閱卷大臣十月轉左侍郎十四年八月充順天鄉試副考官九月吏部文選司賄選道員案發刑部承審司員袒護同年案懸多日經給事中富新奏劾元之坐派員疏忽奪俸十一月調戶部右侍郎兼管錢法堂事務十五年四月轉左侍郎兼管三庫事務閏六月充江西鄉試正考官八月調刑部右侍郎十二月刑部堂印被竊革職留任尋以人印並獲改降三級留任十六年三月兩江總督陶澍等奏籌約束糧船水手章程元之偕大學士長齡等遵旨列款議覆一嚴查藏匿兇器一嚴定頭蛇保結一嚴寘兇徒重典一嚴治游幫匪類一酌寬地方處分一沿途派兵防緝允之四月充朝考閱卷大臣十七年八月署戶部左侍郎旋署右侍郎兼管錢法堂事務十二月提督浙江學政十八年閏四月轉刑部左侍郎仍留學政任五月擢都察院左都御史十二月以前任江西巡撫裕

泰所參丁憂知府張寅各款按問不實跡近挾私奏請查辦經新任巡撫錢寶琛遵旨查明奏覆裕泰並無挾私情弊部議元之降二級調用諭曰在京部院大臣於外省督撫舉劾屬員本不容妄有干預姚元之以一品大員與南昌府知府張寅係屬姻親乃於該員被參之案指稱該撫跡近挾私並將該員去任時生員臚陳政績代爲陳奏實屬冒昧姑念究係言官且其所奏祇爲張寅申辯其事尙小著照部議以示薄懲二十一年三月以英人未靖疏陳廣東形勢並請豫爲之防乘機而戰命交靖逆將軍奕山等悉心籌畫以聞閏三月授內閣學士兼禮部侍郎銜二十二年續纂大清一統志告成元之以前充國史館提調下部議敘二十三年京察屆期上以元之精力漸衰原品休致咸豐二年卒

文蔚

文蔚費莫氏滿洲正藍旗人父富兆福州副都統文蔚嘉慶二十五年進士改翰林院庶吉士道光二年散館授檢討三年陞右春坊右中允四年六月擢翰林院侍講八月充文淵閣校理十月轉侍讀九年二月充日講起居注官陞侍講學士六月轉侍讀學士十一年五月擢詹事府詹事十二月遷大理寺卿十二年二月

稽察右翼覺羅學五月充福建鄉試正考官十月遷都察院左副都御史十四年
賞副都統銜充駐藏大臣十五年十月授鑲藍旗蒙古副都統十二月授盛京刑
部侍郎十六年調兵部侍郎十七年偕將軍奕顯等奏言盛京五部及將軍所屬
筆帖式等官共一百四十餘員其司員六十缺由本處題選者僅二十二缺餘皆
由京銓選本處人多缺少殊形壅滯除禮兵二部事簡缺同毋庸議外請於戶刑
工三部共扣留郎中一缺員外郎五缺主事三缺改爲本處選缺通計三部四十
二缺京外各得其半庶辦事得資熟手筆帖式亦藉以疏通下部議行十八年充
牛馬稅務監督以奉天草豆歉收各驛例支馬乾銀不敷餽養奏請照案借給半
年馬乾分六季扣還允之尋調工部左侍郎十九年正月兼鑲黃旗滿洲副都統
二月稽察七倉五月署正黃旗蒙古副都統七月署工部錢法堂事務八月署左
翼總兵九月署戶部右侍郎兼管錢法堂事務授右翼總兵十一月署左翼前鋒
統領十二月馬蘭鎮總兵琦琛奏參管理籌備庫郎中慶玉各款上命文蔚馳往
會同查辦尋以慶玉供詞牽涉琦琛奏請提京訊辦命解琦琛任文蔚署馬蘭鎮
總兵兼總管內務府大臣二十年正月琦琛供稱文蔚查辦慶玉參款有意偏袒

幹旋文蔚尋以並無偏袒回奏又以琦琛前查鈔慶玉家產究出官員差役收留寄頓情弊遵諭再行訪查奏言別無收留寄頓之處惟慶玉地畝契紙與收租帳簿數目不符顯有隱匿請交承審王大臣訊究並飭直隸總督於遵化州等處示諭佃種慶玉地畝之民戶令其據實呈出庶免遺漏而昭覈實如所請行旋回京三月充會試知貢舉五月署鑲黃旗護軍統領六月授總管內務府大臣七月調鑲白旗護軍統領八月充順天鄉試副考官十一月署管理武備院及工部錢法堂事務十二月充文淵閣提舉閣事以東陵贊禮郎文普呈首承辦採買麥差得受銀兩經馬蘭鎮總兵德興奏聞文蔚遵諭馳赴馬蘭鎮會同查辦尋偕德興訊明文普曾經收受陋規此次因未派麥差私向麪匠索銀未遂輒捏情呈告殊屬狡詐奏請交部嚴議並將採辦易州白麥章程量議變通下部議行二十一年正月奏議內務府三旗管領下領食家口米石章程請每年以六萬石爲度上以爲數太多諭減爲三萬石以示限制旋充經筵講官二月坐失察廣儲司銀庫被竊降一級留任旋以贓犯卽獲寬免三月充會試副考官四月充紫禁城值年大臣五月總理工程處事務六月稽察會同四譯館八月調左翼總兵九月署都察院

左都御史時英吉利船由廣東駛犯浙江陷定海鎮海二縣及寧波府城上命文蔚爲參贊大臣偕揚威將軍奕經馳往剿辦十一月授鑲黃旗護軍統領十二月偕奕經由蘇州進駐浙江省城諭曰自上年軍興以來屢與英軍接仗惟定海一役力戰六晝夜之久擊斃英人無數其餘各仗帶兵大員不能申明紀律激勵將士以致臨陣脫逃非逆夷之兇殘竟不可當實由統兵大員一味姑容故將士不能用命若不亟加整頓何以輓積習而勵軍心著揚威將軍參贊大臣等查明失守各城首先逃匿之將弁兵丁嚴切訊明卽照軍法從事毋稍寬縱至次年偕奕經遵旨查明奏請分別辦理悉如所請二十二年正月進駐紹興府檄將弁襲剿寧波府及鎮海縣城入其郭不克仍卻退二月英軍襲長谿嶺及慈谿山軍營副將朱貴等死之文蔚偕奕經密飭員弁於鎮海城外乘夜進攻焚其舟楫敵多名三月又於定海縣十六門洋面設伏火攻節次獲勝燬英船數十殲敵數百奏入上嘉其調度有方出奇制勝賞頭品頂帶下部優敘四月以英船退出寧波復陷乍浦未能先事豫防褫職留任奪頭品頂帶撤銷議敘旋偕奕經等奏我兵在定海螺頭門與英軍接戰奪獲船隻斬頭目丁時儀之弟於陣尋復火攻獲勝燬英

船多隻殲英人三百餘名奪獲器械無算捷入賞還頭品頂帶六月英船復竄出乍浦犯江南陷鎮江府直偪江寧省城上命奕經帶兵赴援文蔚以籌辦浙江省城及嘉興海寧等處防堵事宜陳奏允之九月英人就撫召來京十月諭曰文蔚擁兵駐紮紹興坐視敵氛日熾但知退守爲計一籌莫展殊屬無能前已有旨飭令回京著交部治罪以示懲儆復命仍折回浙江辦理軍需報銷尋革職定爲斬監候命毋庸留浙拏解刑部監禁二十三年三月賞藍翎侍衛充古城領隊大臣四月御史陳慶鏞以不宜起用入奏復命革職閉門思過咸豐二年賞藍翎侍衛充喀喇沙爾辦事大臣旋調哈密辦事大臣三年三月賞二等侍衛調駐藏大臣五月授奉天府府尹十二月捐輸軍餉下部議敘四年三月戶部奏請令各省採買米石以實京倉文蔚偕盛京將軍奕興等以奉天二麥稷稻出產無多惟高粱粟米尙可採買入奏九月偕將軍英隆等疏言已於奉天省捐輸項下措銀六萬兩以五萬一千兩在錦州海口買粟米五萬石寄倉待運其餘銀九千兩值吉林黑龍江徵兵過境支作車腳飯食之用惟天津所雇海船欠給水腳銀兩曾咨令奉天於餘銀九千兩內按船補給咨覆未到津船三十七隻已齊抵奉天因於錦

州徵存船規項下籌墊銀二千兩暫爲散給請將此項仍由直隸於水腳項下撥解歸款得旨允行五年正月因病賞假一月二月卒子志勳刑部主事志和內閣學士兼禮部侍郎銜志孚候補筆帖式

吳文鎔

吳文鎔江蘇儀徵人嘉慶二十四年進士改翰林院庶吉士二十五年散館授編修道光二年充山西鄉試副考官四年丁父憂五年丁母憂七年服闋八年充湖北鄉試正考官提督河南學政十一年充文淵閣校理十二年充順天鄉試同考官十三年三月充會試同考官四月陞右春坊右贊善六月轉左春坊左贊善旋陞翰林院侍講七月大考二等賜文綺轉侍讀充日講起居注官八月陞侍講學士充咸安宮總裁十四年三月轉侍讀學士八月提督順天學政十六年以選拔屆期疏言直隸考取選拔向有卷費冊費諸名目貧乏者至不能應考曾經前學臣毛式郇奏請禁革茲恐積久玩生再行嚴禁至選拔爲掄才大典登進之階較捷易起招搖之弊臣衙門書吏家丁自應加意約束惟扃門校閱時內外間隔聞見難周請敕下直隸督臣通飭各府州縣及提調各員嚴密察防如有匪徒在外

招搖撞騙迅卽拏究懲辦允行三月陞詹事府詹事仍留學政任五月陞內閣學士兼禮部侍郎銜召回京九月充武會試副考官十七年六月署禮部左侍郎八月充玉牒館副總裁國史館副總裁十月擢禮部右侍郎充順天武鄉試正考官十二月兼署刑部右侍郎十八年二月署經筵講官三月充會試副考官四月充庶吉士散館閱卷大臣殿試讀卷官閏四月調刑部右侍郎五月轉左侍郎九月兼署戶部左侍郎十月以安徽生童滋鬧廬鳳潁道署經學政王植奏聞命偕協辦大學士吏部尙書湯金釗馳往查辦十九年正月訊屬實治如律並以廬鳳潁道胡調元辦理未協及失察之鳳陽府屬各教職奏請分別議處二月復偕湯金釗遵旨赴浙江查辦被參嵒縣知縣何瑞榴等縱容門丁各款屬實奏請分別嚴議免議三月以御史周春祺奏江南漕運武弁養匪害民伍長盜米病丁並奏江寧布政使唐鑑於江寧省城爲女建祠任令胞弟唐子玖署外居住恐有屬員夤緣鑽刺情弊復遵旨偕湯金釗馳往查辦尋將武弁運丁分別懲辦其唐鑑各款查省城有鑑父祠堂其女有墳無祠其胞弟署外居住查無倚勢招搖劣跡惟鑑父唐仲冕在江寧置有房產設立祠堂唐鑑於簡放江寧藩司時不卽據實聲明

鑑女病故並不送回原籍輒借寺旁隙地營葬致招物議請將唐鑑下部議處均從之又以江南河道總督麟慶奏請修理惠濟福興兩閘要工偕湯金釗遵旨順道查勘屬實奏覆報聞四月授福建巡撫十月偕署閩浙總督魏元烺福州將軍嵩溥奏籌海口查拏販運鴉片章程一外洋設法防查以杜偷越一口岸分別稽查以免疏漏一水路互相嚴禁以專責成一關口令委員親自查驗以防夾帶下部議行十一月以御史焦友麟奏閩省營伍廢弛遵旨查覆略言漳泉民風强悍從前地方殷富各姓宗祠中歛有公費專爲械鬪之用每出一案地方官會營彈壓將弁及兵丁需費不等州縣亦卽借兵費名目勒派近年公費無出械鬪亦較少至洋船夾帶鴉片兵丁交通包庇前曾訪知水師把總林和國有包送情弊奏參革職陸營兵丁尙未聞有包庇之事疏入諭以隨時訪查嚴辦十二月兼署閩浙總督時英吉利船遊駛內洋二十年七月文鎔偕欽差兵部尙書祁雋藻刑部右侍郎黃爵滋閩浙總督鄧廷楨奏籌備海防並揀選水師將領八月偕鄧廷楨奏請防堵經費均允行九月復署閩浙總督向例琉球國間歲一貢嗣於道光十九年諭改爲四年一次至是中山王尙育咨稱琉球地處海邊素多風患惟朝貢

以時則風調雨順每遇貢年歲必大熟又貢船出入閩疆歲頒時憲書得以因時趨事庶務合宜又琉球不產藥材俱藉貢船載回得以養生治病又航海鍼法全賴隨時學習輪流更換若四年一朝則豐歉不齊人時無準藥品闕乏鍼盤荒疏應請奏復舊制十一月文鎔奏聞諭曰據奏情詞極爲眞摯著如所請並允該國陪臣子弟四名隨同貢使北上入監讀書十二月調湖北巡撫未卽赴任二十一年正月以英人反覆肆擾奏請添撥海防經費允之又密陳廈門情形略言商民紛傳廣東有許與廈門馬頭通市之說查廈門周圍環海地方五十里北達會垣東爲臺澎唇齒西爲泉漳門戶係通省咽喉若令外人闖入必益肆其占據之謀防之則已無險可扼聽之則將爲所欲爲其害實不可勝言上韙之又以上年英人駛擾廈門經官兵擊退遵旨奏保總兵寶振彪吳建勳副將靈德遊擊武攀鳳陳勝元等在事出力密疏以聞五月入覲調江西巡撫九月以江西德化等十縣夏間江湖泛漲低田秋收失望奏請給一月口糧並將補種復淹之南昌等四縣原勘最輕之安義縣及廬陵等三縣晚禾雜糧均有傷損奏請蠲緩遞緩如所請行二十二年接纂大清一統志告成文鎔以前充纂修下部議敘二十三年五月

以本籍桃北汛河決捐助經費下部優敘閏七月奏請將宋臣文天祥從祀文廟略言查宋少保信國公右丞相文天祥志宗孔孟生死不渝高宗純皇帝御製文曰文天祥忠誠之心不徒出於一時之激久而彌勵浩然之氣與日月爭光蓋志士仁人欲伸大義於天下不以成敗利鈍動其心也煌煌聖訓千古定論所著文山集十六卷其舉進士策以法天不息爲言考官王應麟稱其古誼若龜鑒忠肝若鐵石此外發爲文詞無非扶植綱常維持名教其爲學以立誠爲主以程朱爲宗黜異端崇孔氏以之祀學宮洵爲不愧下部議行二十四年遵諭保奏知府倪良燿麟桂吳式芬知州周玉衡同知程燦策知縣曹士桂等報聞二十五年奏拏獲青蓮教匪戴理釗古魁連等論如律二十七年四月以御史朱昌頤奏陳漕務積弊請將幫弁及地方諸費明定章程給事中雷以誠奏請裁減旗丁津貼各款均遵旨議覆疏言查江西糧額較輕津貼亦少嘉慶年間疊次將旗丁各項陋規十五款分別裁革近年復嚴切查禁並無踵事加增官民亦屬相安今若將幫丁及地方諸費明立章程是以本非例給之銀額定之項一一懸爲令甲不特事多窒礙抑且跡類加徵在昔申明明例禁猶慮不肖之員暗中需索若令明定章程

更恐有所影射例外浮加與其紛更而事有未便不若循舊而察覈從嚴從之十月拏獲南贛等府會匪謝詞封等九十三名治罪如律二十八年六月調浙江巡撫七月由玉山縣行抵浙江衢州訪聞衢州鎮標左營遊擊薛思齊有借端訛索商旅情事八月抵任卽奏褫薛思齊職遣戍新疆又甄劾署歸安縣知縣李玉典等五員分別降革休致均允行九月以浙江各廳州縣有七十七缺多係署事之員奏言此中紛紛調署甚有一員遞署他缺二三處久不回本缺者有卸署後不回本缺閒住省垣者以致交代之案愈積愈多輾轉不能算結且官無定所卽政難考成見在訪司分別覈辦勒回本缺或不堪回任者卽令揭參其實係空缺及要地需才亦祇准專員署理不得紛紛更調以專責成又以各府州縣一書院掌教多至數人幕友中並有書啟徵收號件等名色每年支取乾脩其實均不到館上司循紳士遊客之請薦之屬員屬員勉爲酬應而其中蒼猾之員卽隱以此挾制上司藉口賠累虧庫項求調濟弊端不可勝言請嚴檄通行禁絕疏入上嘉勉之十一月以覈辦清查需人奏請簡派戶部保列一等司員赴浙幫同鈎稽上以向無此例不許仍責成文鎔遴選妥員覈實辦理二十九年正月以本籍水災捐

銀備賑下部優敘閏四月偕欽差倉場侍郎季芝昌清查浙江鹽務奏籌變通章程一杭嘉紹三所引鹽分別加斤止令完交正課一松所引鹽酌裁科則一虛懸口岸選商接辦並籌款收鹽一緝私責成官商由運司審覈一緝獲私鹽分別充賞及補催作正配銷一禁革引地陋規一覈裁巡驗浮費五月偕閩浙總督劉韻珂奏督剿漁山島盜藪獲積盜百餘人寘諸法沈燬盜船並將巢穴門戶分別堵除得旨嘉獎時浙江積歉本年杭嘉湖紹嚴五府又夏潦爲災六月奏招商販運臺米洋米山東小米雜糧各海關俱免其納稅並請撥款備賑又請將文闡鄉試展緩一月俱允之旋以遇災恐懼上疏自劾懇求罷斥上責其迂腐無能率意上瀆嚴飭之並革去頂帶暫留浙江巡撫之任十月捐銀備浙江各屬賑需並捐備江蘇本籍賑需下部優敘十一月奏親赴嘉湖一帶災區查察賑務並無冒濫遺漏其被浸之枯桑經七八月後暢晴煦暖漸次發榮並有野蠶作繭懸綴桑顛用以縲絲貧民頗資接濟報聞三十年文宗顯皇帝御極詔求賢才四月文鎔奏保布政使汪本銓按察使黃宗漢知府余士璫同知畢承昭知縣段光清楊裕深等又以上年辦賑官紳奮勉出力奏保秀水知縣江忠源等五月西防廳所屬北岸